

適園叢書

張宗祥





建炎以來朝野雜記卷五

甲集

宋李心傳撰

朝事一

高宗卽位冊文

淵聖北狩康王在山東羣寮請奉大統上謙讓未受時趙伯山延康守淮寧與諸鎮爭爲盟主而宗室在京西或招羣賊僭置乘輿服御上優容之一日羣寮議纂服之禮宗室承宣使仲綜等曰今二帝蒙塵王不當卽位宜著淡黃衣稱制不改元下書誥四方副元帥汪廷俊等以唐肅宗故事折之參議官耿伯順語仲綜曰公是宗室豈不避嫌仲綜語塞乃定卽位於南都焉五月庚寅朔王登壇告天冊文曰嗣天子臣

某敢昭告於皇天上帝金賊亂華二帝北狩天支戚屬混於穹居宗社罔所依憑華夏罔知攸主臣某以道君皇帝之子奉宸旨以總六師握大元帥之權倡義旅以先諸將冀清京邑復兩宮而百辟卿士萬邦黎獻謂人思宋德天眷趙宗宜以神器屬於臣某辭之再四懼不克負荷貽羞於來世九州四海萬口一辭咸曰不可稽皇天之寶命慄慄震惕敢不欽承尚祈陰相以中興於宋祚冊文記室滕子濟所撰也禮畢上流涕卽位於府治之正衙壇在府治中門之東實耿伯順建議所築後名其壇曰受命中興之壇

中興定都本末

靖康末高宗初建元帥府於河北後聞京城破汪廷俊等遂

奉王如山東久之聞張邦昌僭立廷俊等欲奉王走宿州謀
渡江左先鋒至山口鎮三軍藉藉乃罷行五月王卽位於南
都六月李伯紀入相將奉鑾輿狩襄鄧八月伯紀去位十月
上遂幸維揚時黃懋和汪廷俊爲政也三年二月粘罕滿遣
五千騎犯揚州上幸杭州駐蹕三月苗傅劉正彥謀逆以上
爲睿聖仁孝皇帝居別宮四月傅等敗上進幸江寧冬兀朮
兵入寇上用呂元直議自明州幸海四年春始還越州時范
覺民爲相也覺民罷紹興二年正月以漕運不繼復移臨安
冬兀朮兵入趙元鎮張德遠共事上幸平江時朱藏一首建
避兵之議元鎮關之朱由此罷相明年兵退上復還臨安六
年秋劉豫入寇上進幸平江七年春元鎮罷德遠獨相乃有

建康之幸秋酈瓊叛德遠罷元鎮復相八年二月復奉上還
臨安其冬元鎮罷秦會之獨相自此不復遷都矣

褒錄元祐黨籍

紹興初朝廷褒錄元祐黨人且擢用其子弟六年正月樞密
院檢詳文字范直方言自蔡京用事凡妬賢嫉能助成黨論
之人偶乖迎合遂致睚眦京卞欲終廢之故借黨以報怨如
李清臣首唱異議邢恕誣證太母楊畏反覆變詐皆隸名石
刻之人今又推恩子孫傷教敗俗莫此爲甚請命近臣審定
而甄別之上納其言遂命給舍甄別元祐黨籍它日上謂趙
忠簡曰一時甚有濫居黨人之數者范冲任申先皆能辨之
先是渡江以來黨碑無復存者凡自陳者悉以胥吏私傳之

本爲據紹興四年陳去非在吏部以爲言始加搜訪後二年
乃命甄別焉時朱子發爲給事中董令升任世初爲中書舍
人元鎮以爲賢故付以此事然亦不克竟也直方蓋忠宣公
孫云

籍記崇觀姦邪

建炎初議者請以崇寧以來無狀之人爲一籍詔諫官御史
具名以聞臺省各錄副本不許堂除及任守令事已行俄命
執政參酌非罪惡深重之人皆許自新量才擢用時宰相黃
懋和汪廷俊也四年范覺民相吏部侍郎李陵上疏請收用
近年廢黜之人且詔臺諫勿復論列敕榜朝堂臺諫沈與求
等以爲言陵遂坐黜紹興五年趙忠簡相會鄧洵仁右丞卒

詔贈官推恩如故事劉立道爲中書舍人封還詞頭言今日之事洵仁父子實有力焉得死牖下已爲失刑乃敢援例求恩不知上皇今在何地請自今崇寧以來侍從以上如洵仁等輩一切更不推恩自靖康初追錄元祐諸臣然議論不一是非淆混忠簡夙有此志以身任之因繳洵仁詞頭遂歷言熙豐紹聖崇觀政事人才善惡利害本末甚備上嘉納命榜之朝堂焉

臨軒疏決

自眞宗以來率以盛暑臨軒慮囚建炎初廢二年六月始詔疏決行在揚州繫囚雜犯死罪已下減一等杖以下釋之其後越州建康皆同此制紹興二年六月上在臨安甲申始臨

軒疏決御史臺大理寺臨安府三衙諸軍繫囚自是遂爲故事然諸道未及也五年趙元鎮爲相復舉故事命諸道提刑以盛暑行之迄今不改然憲臣多不能徧所部則以諸州通判代行久之通判亦不能行第傳檄往來徒爲文具而已朝廷屢戒飭之終不能革

參政分治省事

元豐官制尚書左右丞分治六曹後以爲皆執政官乃令通治省事紹興四年張魏公再入省府上諭魏公曰朕於三四大臣皆當分委張浚可專治軍旅胡松年可專治戰艦如財用亦須委一大臣後魏公相不果行七年魏公獨相三月詔尚書省常程事權令參知政事分治於是張全真治吏禮兵

房陳去非治戶刑工房九月魏公免復詔三省事令參知政事權輪日當筆更不分治常程事竣除相如故自是參知政事復通治省事矣

修政局

自王荆公秉政始創制置三司條例司以行新法其後蔡儋州當國踵其後置講議司儋州罷張文忠代之乃置政典局不隸三省靖康初徐擇之吳元中共政又置詳議司俄以人言罷紹興二年呂元直秦會之同相元直督軍於外會之欲奪其柄乃置修政局自領之詔職事官及守令以上言省費裕國強兵息民之策以戶部侍郎黃叔敖爲參詳官置局如講議司故事曾諫議統時爲尙書郎謂會之曰宰相事無不

統何以局爲會之不聽數月會之罷是日彗星出議者以爲
修政局所講多刻薄之事失人心致天變後五日遂罷修政
局焉

經界法

經界法李椿年仲永所建也紹興十二年仲永爲兩浙轉運
副使上疏言經界不正十害一侵耕失稅二推割不行三衙
前及坊場戶虛換抵當四鄉司走弄稅名五詭名寄產六兵
火後稅籍不信爭訟不息七倚閣不實八州縣隱賦多公私
俱困九豪猾戶自陳稅籍不實十逃田賦偏重故稅不行十
一月癸巳疏奏上納其言仲永又言平江歲入昔七十萬斛
有奇今實入才二十萬耳詢之士人其餘皆欺隱也請攷按

覈實自平江始然後推之天下因上經界畫一其法令民以
 所有田各置帖基簿圖田之形狀及其畝目四至土地所宜
 永為照應即田不入簿者雖有契據可執並拘入官諸縣各
 為帖基簿三一畱縣一送漕一送州凡漕臣若守令交承悉
 以相付詔專委仲永措置遂置局於平江周敦義時守平江
 見仲永言當均稅不當增稅仲永不從敦義遂坐事免十三
 年六月詔頒其法於天下仲永亦遷戶部侍郎十五年仲永
 以憂去命王承可以戶部侍郎代之承可請員外郎開封李
 朝正同措置又請令民十家為甲自陳不復圖畫打量即有
 隱田以給告者正承承可罷朝正權戶部侍郎十六年二月十
 七年春仲永免喪復故官專一措置經界正承仲永復以結

甲自陳爲不便請令州縣造圖而遣官覈實先成有賞慢令有罰十九年冬經界畢民多詣臺省訴其不均曹庭堅

筠時

爲臺官因奏仲永私結將帥曲庇家鄉請罷之更選官覈實

十一月初朝廷旣頒其法於諸道其後有司畫圖供帳分立

土色均認苗稅民始病其煩仲永旣遣官屬分往諸路又遣

覆視之議者不以爲便明年二月壬子戶部請委漕臣限一

季結絕悉罷先所遣官三月戊戌遂下詔曰昨李椿年乞行

經界初欲去民十害遂從其請今聞寢失本意可令監司將

乖繆害民者日下改正時敕令所刪定官開封鄭克經界川

峽四路頗峻貴州縣故蜀中增稅亦多又官田號省莊者所

租有米穀粟麥麻豆芋栗桑棗鴨卵之屬凡十八種皆合輸

以錢故民至今尤以爲患時馮濟川懃爲瀘甯安撫使論於朝於是瀘敘長寧獨免經界仲永蓋饒州浮梁人云然諸路田稅由此始均今州縣拈基簿半不存黠吏豪民又有走移之患矣

籍記監司郡守

紹興初婁仲輝資政爲左史請命從官舉可爲監司者令中書籍記姓名遇闕除授上從之已而謂輔臣曰朕亦當書之屏風以時揭貼其不任職而無他過者以自陳宮觀與之乾道初孝宗新創選德殿於御座後作金漆大屏分畫諸道各列監司郡守爲兩行以黃簽標識居官者職位姓名其背爲華夷圖云

隆興臺諫

隆興初湯慶公復除右僕射王諫議

大寶

上章論列不從奉

祠去自是臺諫多引退者張忠簡

闡

時爲工部尙書因奏事

面請增臺諫員上曰士大夫多賣直故難其選忠簡曰直言

士之所尙陛下開納則有益於國家胡忠簡

銓

時爲左司因

造朝以張公之語質之上曰此語非也朕以張闡所言謂臺

諫論事當辨曲直非謂賣直也明日張公請對又論臺諫一

空上曰卿與胡銓昨日議論一同得非傅會朕正欲辨所論

曲直非惡直也忠簡曰陛下當受垢納汙若校曲直是非便

是拒諫上改容納之隆興主聖臣直蓋如此

隆興和戰

孝宗初受禪起張魏公爲江淮宣撫使上委以經略北事魏公欲命李顯忠邵宏淵引兵進取而史魯公以宮寮位執政謂強弱不敵未可進也數從中止之魏公及陳魯公皆主招納東北人史公尤以爲不可因城瓜洲白遣太府寺丞史正忠志道合兩淮帥臣監司集議俾諭以廟堂指意志道有口辯旣見魏公論說云云魏公之意不回而史公亦數因書爲言兵少而不精二將未可恃魏公不聽也時上意鄉魏公故史公拜右僕射而魏公亦拜樞密使都督江淮軍馬會顯忠宏淵進師取宿州命從中出三省樞密院不預知史公遂丐免不數日符離師潰上意亦寢疑湯丞相進之還朝復主和議由是魏公遂絀而淮泗唐鄧商秦棄矣論者惜之

孝宗革冗官

孝宗初受禪以官冗恩濫議革之欲定制百官已任子者遇郊恩權免奏薦開賢良科令中外普薦而權罷特奏名隆興二年秋詔右諫議大夫王之望右正言尹穡殿中侍御史晁公武參酌來上之望言陛下卽位未久恩澤未徧此二事關於士大夫者甚眾願少寬之不已則宜立奏薦限員踰數者許回授罷門客親戚漕司之試止移鄰州如是則省額可減百十人此救弊之策也疏奏亦不果行至淳熙中始定奏薦員限云

上書補官

乾道初陳正獻公參知政事時有衢州進士毛日新者以上

書補文學陳公同葉相子昂覆奏其事且曰陛下識其人否
上曰朕不識之但見累上書陳公曰士人上書果有益國家
如賈誼之治安策魏元忠邊防利害雖朝奏暮召可也今觀
其書無甚可行之事此例一開恐舉人舍本業而事上書紛
然何以應之又安知非假手以欺朝廷也上乃止

乾道郊賜

國朝故事郊祀大禮宰臣樞密使賜銀帛四千匹兩執政官
三千三司使千資政殿學士五百密直已上四百雜學士省
副三百中丞給諫舍人待制各一百慶歷二年減冗費於是
執政以上各減一千三司使減三百餘減二百中丞以下減
三十遂爲定制焉渡江以來宰臣郊賚匹兩不過千乾道六

年虞忠肅爲大禮使率同列懇辭上不許忠肅曰舊來銀一兩爲錢四百緡一匹爲錢七八百故千匹兩其直不過千餘緡今則七八千緡矣或者但言祖宗時錫予甚厚今多從裁減不知所賜之直已過祖宗時數倍也參知政事梁文靖公奏曰今祕閣中有太祖御札禁軍券錢至親筆裁減一二百者上曰雖一麻鞵之微亦經區處祖宗愛惜用度如此於是上遂許羣公之辭自是進書加恩悉多辭賜矣

孝宗總核名實

孝宗總核名實於官職未嘗妄授劉忠肅爲建康留守終更當再任上知其政績特除觀文殿學士以旌之執政擬除目云劉琪居守建康已及二年可除觀文殿學士再任上曰以

及二年而除職非用人之體乃改云居守建康績效顯著

淳熙慶壽禮

淳熙中再行慶壽禮時舊相史文惠以太保保寧軍節度使魏國公致仕居明州陳正獻以少傅觀文殿大學士福國公致仕居興化軍十二年十一月丁未詔二公赴闕立班令明州興化軍以禮津遣上又賜手札令勿固辭用副延竚陳公以道遠不能至十二月史公至江皋上遣使賜銀合茶藥又詔都門外賜御筵及見畢對御賜燕皆固辭甲戌入見內殿上爲之曲宴且還賜第居之十三年春正月庚辰朔旦上率百官簪花用樂上壽於康壽殿廷是日自人主至羣臣禁衛吏卒往還皆簪花癸未百官拜表稱賀於文德殿又移班稍

東箋賀中宮史公丐以戊子朝辭上不可賜手筆留之推恩
拜史公太傅陳公少師二月壬子賜史公玉帶金魚庚子史
公入辭且請歸賜第詔修內司交割又叩三省樞密院官燕
餞恩數悉視文潞公禮遇之優自中興以來所未有

大理獄非得旨不許送理官宅

自神宗置大理寺獄著令專一承受內降朝旨重密公事及
推究內外諸司庫務侵盜官物餘民事送開封府乾道三年
二月癸酉詔事涉情理巨蠹及經州縣推勘番異者方許取
旨送寺七年四月辛亥入詔諸處合送寺公事並取朝旨時
曾欽道爲戶部尙書不以爲便是歲五月詣都堂白云六曹
所行最計利害若埃取朝旨恐事致彰露犯人東西請先次

送寺仍中朝廷照會虞丞相出劄子許之自是六曹寺監事無巨細率皆送寺矣漳熙十四年王順伯少卿爲大理寺丞轉對言非所以重天獄請復舊典十月丁卯許之先是大理寺官散居儼舍論者以爲非宜漳熙中乃創大第聚居之如臺諫宅之比

福建經界

自紹興經界後久之諸道經界圖籍多散佚吏緣爲姦漳熙八年閏三月癸巳新知江陰軍王師古言於朝詔漕臣督州縣補葺八月戊辰諫官葛楚輔言其擾民乃止初紹興之經界也漳泉汀三郡以何白旂作過之後朝廷恐其重擾止不行然漳泉富饒未見其病惟汀在深山窮谷中兵火之餘舊

籍無存者豪民漏稅常賦十失五六郡邑無以支吾因有計
口科鹽之事一斤之鹽出數斤之直論者患之漳熙十四年
四月福建轉運判官王回代還入見爲上言其病不專在鹽
請先行經界上是其言丙申以回爲戶部右曹郎官往汀州
措置未至官有武臣提刑言其不便遂止之其後朱文公守
漳州亦以爲可行而迄不聽也

軍中承代敦減

渡江以來江上及關外諸軍使臣死亡率以它人承代朝廷
患之乾道二年正月建康都統劉源繳納事故人付身二萬
有奇樞密都承旨龍大淵言於朝詔進源官二等然統帥多
庇其部曲罕能行朝廷乃許之自陳敦減補正漳熙七年三

月丁丑權吏部侍郎閻蒼舒才元言今報到內外承代官數
二萬三千五百餘人請置籍取會銷銘從之自後冒官率皆
補正矣六部舊無圖籍八年七月才元始取索侍右簿書凡
七百八十冊請下本部收管并令佗部倣此以扼吏姦從之
漳熙臧否郡守

孝宗留意治民紹興三十二年十一月丙申首詔諸路帥臣
監司每日悉具部內知州治行臧否連銜聞奏後以多事不
克行漳熙八年閏三月辛巳復命監司帥臣歲以所屬郡守
臧否來上皆著事實卽考察不公者御史劾之十年四月丙
申詔新知歸州湯鷺罷所除官己酉以知常州范仲圭爲利
州路轉運判官知瓊州韓璧提舉廣東常平茶鹽公事知復

州閭門祇候王去惡爲右領軍衛中郎將皆用監司奏臧否也十二年六月丁丑浙東安撫使鄭丙提舉常平等事句昌

泰皆坐奏臧否稽緩降官趙衛公時判江陵奏言當舉劾而不必臧否之不從趙公因具文以報事乃已七月乙巳詔漳

汀州見任守臣令監帥司精加臧否來上已除者埃闕到令

都堂審察既而漳守黃啟首以臧聞遂除直祕閣再任十三

未幾又遷廣東轉運判官九月乙巳侍御史陳賈奏言諸路

臧否既上而黜陟未行請令諸州見任守臣係監司所否之

人許令自陳並與宮觀違者御史糾之使臧者益勸否者知

勉又言諸路臧否外聞多不聞知請劄下給舍臺諫其不公

不實者許繳駁論奏從之十月癸亥又詔今後諸路守臣臧

否限次年三月終川廣五月終聞奏時青神蒲杲知忠州爲
監司所否杲代還入見上問之杲曰臣得罪於監司不得罪
於百姓翌日上諭輔臣曰蒲杲誠直可取十三年潼川路漕
臣岳霖奏知瀘州眉山史舉爲否舉帥臣也五月壬辰詔罷
舉時趙昌裔者守全州帥臣林栗監司宋若水張柳管鑑連
年以爲否六月癸丑詔昌裔奉祠右諫議大夫陳賈言非所
以示懲七月己丑遂寢其命十四年六月癸未江西提刑馬
大同坐臧否稽緩降秩時夔州路安撫楊輔所奏亦久不至
己丑詔詰之尋貶秩上旣留意黜陟之政由是諸道皆奉承
之然行之十餘年或不免有徇私之弊上亦疑其不可盡信
嘗以諭輔臣要在精擇部使者而以臺諫考察之庶乎可也

上語在十五年七月
丙午專具宣諭聖語

經筵轉官裁省

故事經筵講讀一書畢自儒臣修注下至中人吏士皆遷一
官雖篙工廩卒無不霑被
淳熙十三年冬陳大諫賈因史院
進書言酬賞泛濫上納其說於是吏輩易轉官爲磨勘者無
慮三數百人議者猶以爲濫十四年春陳又言比經筵及東
宮讀陸贄奏議皆終篇經筵轉官者三十二人東宮講堂轉
官循資者二百九十一人平陽郡王府授論語撤章轉官者
二十二入至有點授論語末篇才一日而與轉官者允濫極
矣請自今並行裁抑官吏實與者量予推恩其餘竄名一切
省汰或量予犒設上從之時人皆以爲當

役法總要

自高宗紹興中始修常平免役之令其後歲月浸久論建滋益多視舊法或牴牾吏緣爲姦淳熙末中書舍人莆田陳居仁詳定所司敕令因請下敕令所取祖宗免役舊法又於戶部括取紹興十七年以後續降指揮精加參考其有與舊法牴牾者悉行刪去萃爲一書名曰役法撮要書成鏤板布之

天下從之

十四年三月辛酉

建炎以來朝野雜記卷五

甲集

建炎以來朝野雜記卷六

甲集

宋李心傳撰

朝事二

道學興廢

自熙寧元豐閒河南二程先生始以道學爲天下倡二先生少學於汝南周茂叔其後學者翕然宗之二先生死其高弟門人前有河南朱公掞劉質夫李端伯京兆呂與叔蘇季明上蔡謝顯道延平楊中立建安游定夫河東侯師聖伊川門人後有河南尹彥明張思叔東平馬時中福清王信伯涪陵譙天授中立彥明遭遇靖康建炎紹興之閒致位通顯天授入朝於靖康而不合紹興中再召不起後隱青神山中建安

胡康侯學春秋於伊川而不及見以楊謝爲師友紹興初秦會之爲亞相引康侯侍經席一時善類多聚於朝俄爲呂元直朱藏一所逐朱呂罷趙元鎮相彥明以布衣入侍講經生學士多召用焉元鎮罷張德遠獨相陳司諫公輔首上章力排程氏之學以爲狂言怪語淫說鄙論鏤榜下郡國切禁之康侯疏言今使學者師孔孟而禁不得從頤是入室而閉其戶也其後會之再得政復尙金陵而洛學廢矣中立傳郡人羅仲素仲素傳郡人李愿中原中傳新安朱元晦康侯傳其子仁仲仁仲傳廣漢張敬夫乾道淳熙間二人相往來復以道學爲已任學者號曰晦庵先生南軒先生東萊呂伯恭其同志也南軒侍經筵不久而去晦庵屢召不起上賢久之

王丞相准當國不喜晦翁鄭尙書丙始創爲道學之目王丞相又擢太府陳寺丞賈爲監察御史俾上疏言近日搢紳有所謂道學者大率假其名以濟其僞望明詔中外痛革此習每於除授聽納之際考察其人擯斥勿用晦翁遂得祠又數年周洪道爲集賢相四方學者稍立於朝會晦翁除郎以疾未拜而林侍郎栗劾其欺慢且詆道學之士乃亂臣之首宜加禁絕林雖罷去而士大夫譏貶道學之說迄不可解甚至以朋黨詆之而邪正幾莫能辨至紹熙末趙子直當國遂起晦翁侍經筵而其學者益進矣晦翁侍經筵數十日而去位子直貶永州何參政澹爲中執法復上擊道學之章劉樞密德秀在諫列又申言之於是始有僞學之禁矣先是光宗登

極劉德秀為殿中侍御史上疏極言兩議交攻之禍詔下其章後五年偽學乃禁

學黨五十九人姓名

自禁偽學之後劉侍郎珏以故御史免喪入見上言前日之

偽黨今日又變而為逆黨且獻策以消之於是自慶元至今

以偽學逆黨得罪者凡五十有九人宰執四人趙汝愚右丞相

留正少保觀文殿大學士王藺觀文殿學士知潭州周必大少傅觀文殿大學士待制以上

十三人朱熹煥章閣待制兼侍講徐誼權工部侍郎知臨安府彭龜年吏部侍郎陳傅

良中書舍人兼侍講辭叔似權戶部侍郎兼樞密章穎權兵部

侍講鄭湜權刑部樓鑰權吏部林大中吏部侍郎黃由權禮部黃黼

權兵部何異權禮部孫逢吉權吏部餘官三十一人劉光祖

侍郎

起居郎呂祖儉大理寺丞葉適太府卿總領楊方秘書郎項安世秘書

省校書郎沈有開起居郎曾三聘知郢州游仲鴻軍器監主簿吳獵御史李

祥國子楊簡國子博士趙汝讜添差監左藏西庫趙汝談前淮西安撫司幹官陳峴

祕書省范仲黼著作郎兼權禮部郎官汪逵國子司業孫元卿國子博士袁燮太

博士陳武國子正田澹宗正丞兼權工部郎官黃度右正言張體仁太府卿蔡幼

學福建提舉黃灝浙西提舉常平茶鹽公事周南池州府教授吳柔勝新嘉興府學教

授李堽校書郎王厚之直顯謨閣江東提點刑獄孟浩湖州知湖趙鞏祕閣修撰

白炎震新通判成都府武臣三人皇甫斌池州都統制范仲壬知金州張致

遠江西兵馬鈐轄已上士人八人楊宏中周端朝張衛林仲

麟蔣伸徐範並太學生蔡元定呂祖泰慶元三年十二月丁酉知

温州王沈朝辭入見請自今曾係偽學舉薦升改及舉刑法

廉吏自代之人並令省部籍記姓名與閑慢差遣事卽行黃
子由爲吏部侍郎建言人主不當待天下以黨與不必置籍
以示不廣沈故資政殿大學士韶曾孫也五年六月己丑擢
沈利路轉運判官時子由權禮部尙書未幾出帥蜀張參政
巖爲殿中侍御史奏子由阿附權臣植立黨與遂降子由雜
學士奉祠焉

御筆禁言舊事

黨旣旣作隆慈與上欲消之御筆今後給舍臺諫論奏不必
更及舊事務在平正以副朕救偏建中之意時劉德秀爲諫
長與察官張德秀等上疏言繼自今舊姦宿惡或滋長不悛
臣等不言則誤陛下之進用言之則礙今日之御札若俟其

敗壞國事復如前日而後進言則徒有噬臍之悔三者皆無一而可望下此章播告中外令舊姦知朝廷紀綱尙在不致放肆從之尋詔改不必更及舊事爲不必專及舊事黃元章爲殿中侍御史獨上言治道在黜其首惡而任其賢使才者不失其職而不才者無所憾故仁宗嘗曰朕不欲留人過失於心中此皇極之道也至於前事有合論列事體明證有關國家利害者臣不敢不以正對疏奏元章竟徙佗官

慶元罷臧否

孝宗淳熙中始嚴監司臧否郡守之令旣申牧伯部使者數人稽緩之罰時趙溫叔守荆林黃中守潭爲上所禮特下詔趣之然行之十餘年其後士大夫往往以人情之厚薄爲臧

建治七年臺恭錄卷之九
四
否論者頗患其不公慶元四年十一月庚申新知漢陽軍蔣
用之朝辭上疏稍論真偽朝廷是之明年三月甲午右正言
陳自強復以爲言於是臧否遂罷

慶元臧否縣令

慶元中張君量帥廣西請令監司帥守各於歲終以所部縣
令分臧否上中下三等合平而爲士次春上奏頒之考功如
臧甲於一路者取旨升擢而否之最者亦加黜責其它次第
斟酌施行以爲懲勸從之時二年六月乙丑也然自後未有
舉行者明年君量入爲臺諫以至樞庭率不能自行其說云

紹熙許薦士嘉泰罷泛舉

國朝薦舉之目自京職官至令錄其來遠矣元祐初司馬公

始奏設文武十科以舉士後又有舉將帥廉吏所知合舊升陟自代等科凡十有一紹熙元年冬又詔監司帥守滿秩造朝陛對之際許薦所部人才一二人如無聽闕文武高下皆無所拘其後三年閒在外被薦者八九百人朝廷不能盡用但令中書省籍記姓名而已四年冬言者謂今被薦者猥眾朝廷疑其私而不信病其眾而難從其閒縱有賢才不免與僥倖者併棄請約之乃詔帥守監司自今毋得獨員薦士慶元元年十一月又詔諸司薦舉連銜以聞明年章德茂帥興元薦知利州閬中蒲叔獻等三人政績有旨與監司及升擢差遣胡紘爲御史上言叔獻等不聞有過人之才而猥以人情之厚薄獨銜舉薦詔勿行嘉泰二年三月右正言施康年

又言近日士大夫有持廉吏及科目薦章十餘至廟堂而得
學官又有挾三四薦而得院轄者執政至無以卻之請除升
改自代十科外悉行罷去如朝廷閒有特旨令內外舉薦者
並具實迹以聞從之自此舉薦冒濫少革矣
元年七月察官
鄧友龍請覺察
所薦非其
人者從之

執政子孫任祠官

祖宗時執政子弟皆得任內外清望官但不爲臺諫兩省耳
自蔡京父子共政秦熈繼之由是典制大壞孝宗惡焉淳熙
八年八月始詔見任宰執臺諫子孫並與宮觀嶽廟理爲資
考慶元六年閏二月詔許用前宰執舉狀爲職司云

姚次韓論奏讞

紹興初陳去非在黃門始申嚴奏讞不當之令其後寢寬慶
元中東南有因詈人至毆死者而行凶之人作何問奏裁姚
次韓愈爲御史上言如此是詈人之罪重於殺人三年三月
壬寅詔自今有司奏讞死罪不當者論如律

便民五事

自紹興初令諸道守臣到官半年陳便民五事既又命給舍

看詳其可行者以聞

二十六年九月壬子

其後寢廢漳熙末復申行之

九年十二月戊午

慶元時劉仲洪爲諫長復請專付檢正都司考覈

取其近情合理者以聞

二年七月戊子

三年四月丙辰復令給舍看

詳以白執政而檢正左右司檢詳擬行之然今諸路守臣所

上言俱無甚可行特姑存政事而已

紹興三年二月甲寅詔守臣到任半年具便民

或邊防五事
以聞著爲令

慶元緊要政目五十事

慶元五年十月右諫議大夫陳自强勉之上緊要政事條目

三十門

人才 財用 軍旅 風俗 諫諍 蓄積 法禁

罰 獄訟 稅賦 學校 爵祿 教化 科舉 命合 賞

任官 監司 守令 奉天 奉祖 宗 任相 祭祀 銓選
荒政 等三十門請令侍從兩省講讀官進故事日於前項

政事條目內選擇一事爲題先敘前代帝王施行得失而證

以祖宗故事然後論今日事體所宜斷以己意俟其進入編

爲一書如一旬而講一事則一歲之間便有三四十事不過

二年朝廷之大政講究畢矣疏奏從之已而學士高文虎炳

如又以二十事上之如前請稽古 勤政 威斷 恤刑
惠民 久任 文章 考課

選吏
歷法

救弊
錢幣

宗廟
漕運

奉親
茶鹽

宗室
常平

兵制
義倉

何自然論薦舉

趙子直秉政引用所知多自外徑除館學者何自然為中執

法以其廢壞壽皇成法嘗上疏言之

元年六月己卯

已而有旨除甲

科及經擢用人外須歷知縣有政績諸司薦舉乃得除職事

官用矯其弊命下自然復言若此用人必有二弊一則其人

政事雖無可述而有勢力可宛轉移書徧屬剡薦鼎來二則

諸司之中苟有强有力者為之主張則佗司莫敢違拒寒峻

之士無繇可進請詔諸司取實有政績者連銜以聞仍關御

史臺照會若有不公許本堂覺察從之

元年十一月庚戌

自然雖有

是言然終不能革嘉泰初鄧友龍察院復奏自慶元三年至

六年在外被薦者無慮千餘人其閒或乏廉聲而舉充廉吏
或素昧平生而舉充所知或不能文而舉可備著述至於廟
堂亦無以處之願詔中外臣寮自今有人則薦無人則闕儻
所薦非人當擇其尤覺察以聞疏奏從之元年七月丙戌然亦未嘗
有覺察者

監司郡守至官交割庫金

孝宗淳熙中有詔守臣任滿以見管錢物交後政或次官收
訖申戶部置籍代者限一月核寔以聞著爲令九年正月乙亥時蜀
人自爲總計及典方面者坐過例饋送各數萬緡皆停官九年

正月戊子
三月己未

郡守銓量

故事諸道守臣皆臨遣漳熙末上以嶺南蜀道遙遠始詔川
廣知州軍見居川廣合闕到半年前奏事人及係見闕去處
並令詣本路轉運司稟事仰漕臣精加銓量人才委堪任使
非昏繆老病之人結狀保明申尙書省十年十月庚子然諸道罕嘗
舉行紹熙末言者論漕司之權比制司爲輕而責亦不若制
司之重權輕則不敢多有所廢黜責輕則不暇詳於顧計州
縣不治職此之由請一付之制司權重則雖廢黜之多而有
所不憚責重則顧計利害之深而不敢苟且如此則昏老疾
病之人不得冒居而州縣無不治矣趙子直始爲政遂自行
之五年十月辛卯其後行之數年議者不以爲當嘉泰元年五月復
有一日並赴闕朝辭之知合州郭公燮等數人代者皆過滿

帥臣劉仲洪因請於朝仍復令制司銓量免奏事焉大抵川
陝道遠守臣奏事者多以爲勞若帥臣公心一意而無請託
喜怒予奪之私則銓量爲得

嘉泰減奏薦

嘉泰初言者以官冗恩濫請凡娶宗女授官者仍舊法終身
止任一子

乾道二年六月集議止任
一子九年改不作非泛

兩府使相不得以郊恩

奏門客文學歸正官不許添差極邊初官不許求郡大臣丁
憂解官遇覃恩不得遷秩著爲令從之

元年八月己卯

建炎至嘉泰申嚴賊吏之禁

自祖宗開基首嚴賊吏之禁重者輒棄市眞宗以後稍從寬
貸然亦終身不用建炎二年春高宗復詔賊罪明白者不許

堂除及親民差遣犯枉法自盜罪至死者籍其貲二月四年

秋詔自今犯贓免死者杖脊流配八月是冬湖口令孫咸坐戊子

贓黥隸連州上謂輔臣曰祖宗時贓吏有例杖於朝堂者黥

而特配尚為寬典十一月紹興四年秀州黃大本遂決刺焉壬子

然高宗性仁厚但行之數人而止七年秋永嘉令李處廉貸

死籍其貲自是為例九月二十六年秋處守鄒榭犯贓當死丙戌

榭鄒忠公志完子也上見其獄蹙額久之曰既贓罪不可貸

乃編置吉州九月隆興二年秋統制官魏尚者盜用所部軍癸丑

食為錢三千緡獄具孝宗諭湯丞相曰故事當直決湯丞相

曰尚武人不足深責願陛下三令五申上勉從之九月遂降己丑

詔禁止十月其後廣西提刑石亨義抵罪始刺配焉乙丑淳熙五

年上既申保任京官連坐之罰十年夏又詔自今自盜枉法

贓罪至死者籍其貲仍決配不以秩位之高下形勢之輕重

朕將一概施行六月戊戌遂命監司帥臣歲舉部內廉吏一二人

其實跡來上令中書籍記無則闕之六月己未然亦未嘗有決刺

者慶元元年倪正父為吏部侍郎建言今之達官貴人贓以

萬計監司臺諫按發不過放罷前之行遣既不究實後之辨

雪遂得有辭請自今以貪墨聞者雖未欲送獄根勘亦合差

官究實懲治庶幾大贓治而小贓懲八月己丑其後亦不克舉行

嘉泰二年冬言者又論臣僚贓累鉅萬具載章疏投聞數月

便得祠祿請自今皆須二年十一月庚午雖有是言然臺諫所論

或得於風聞朝廷察其誣未嘗不按拭也若究實懲治則贓

者不得倖免而枉者可以復直矣舊以絹計贓者千三百爲一匹後增至二千紹興三年高宗以絹直高特下詔增一千九月乾道六年復詔權以四千爲一匹二月迄今遂爲定制辛未

近歲堂部用闕

渡江以來員多闕少中外久患之紹興末寺監丞簿學官大理司直樞密院編修官始皆有待次者乾道五年秋孝宗遂命皆與添差一次自今須見闕乃得除然近歲東南郡守率有待闕至五六年蜀中亦三四年由是朝士罕肯乞外而勢要之人多攘闕者淳熙十三年詔自今存留州郡十五闕止差一政令中書籍記以待職事官外補慶元元年又增爲三十闕非職事官補外毋得陳乞然廟堂牽於丐請率多借用

嘉泰二年夏言者請以嘉興府處台衢嚴信池袁撫江潮漳

泰温徽等州十五闕令中書再行注籍專待職事官請外補

用如有經營留闕之人令給舍繳駁臺諫論奏從之四月今

監司帥臣亦有待闕者今年辛煥柄知夔州而侍左選人用

六年闕侍右小使臣用五年半闕云小使臣初用五年一月

元六年閏六月半闕許之

嘉泰禁私史

頃秦丞相既主和議始有私史之禁時李忠簡光嘗以此重

得罪秦相死遂弛語言律近歲私史益多郡國皆鈇本人競

傳之嘉泰二年春言者因奏禁私史且請取李文簡續通鑑

長編王季平東都事略熊子復九朝通略李杓丁未錄及諸

家傳等書下史官考訂或有裨於公議乞卽存留不許刊行

其餘悉皆禁絕違者坐之

二月甲午

文簡所著長編凡九百餘卷

孝宗甚重之季平子復皆嘗上其書除職遷官仍付史館柄

以父任監行在都鹽倉乾道八年夏上其所編丁未錄二百

卷自治平四年至靖康元年詔特改京官

六月戊戌

付國史院然

紀載無法學者弗稱焉其秋商人載十六車私書持子復中

興小歷及通略事等書欲渡淮盱眙軍以聞遂命諸道帥憲

司察郡邑書坊所鬻書凡事干國體者悉令毀棄

七月戊申

中興

小歷者自建炎初元至紹興之季年雖已成書未嘗進御然

其書多避就未爲精博非長編之比也

集

建炎以來朝野雜記卷六 甲集

建炎以來朝野雜記卷七

甲集

宋李心傳撰

時事

張魏公誅范瓊

范瓊者山東人靖康初幹離不入寇瓊以萬人勤王拜京城都巡檢使二帝北狩張邦昌僭立瓊實與其謀以此遷神龍衛四廂都指揮使高宗卽位釋其罪以爲御營平寇前將軍明年冬俾將兵北伐瓊至東平虜方盛遂自淮西閒道移江東日以聲色自奉又轉而之江西苗劉旣誅呂安老爲諫官首奏其罪且有取瓊之策時陳待制戰爲監察御史奉詔召瓊入朝瓊陳兵以待剝人以懼之陳不爲動徐謂瓊曰將軍

不見苗劉之事乎願熟計之乃引兵趨行在既至未肯釋兵
因奏乞貸管軍左言等朋附苗劉之罪又言招盜賊十九萬
人皆願聽臣節制上駭而怒於時呂忠穆爲相張忠獻在樞
密忠獻奏瓊大逆不道罪惡貫盈今釋不誅他日必有王敦
蘇峻之患上許之呂公奏曰臣與瓊舊有嫌不敢獨任其事
願付張浚劉彥沖彥沖時權樞密院檢校文字忠獻退召彥
沖謀之夜鎖吏於府中使爲榜劄敕書皆備明日朝退乃遣
神武右軍都統制張俊以千人渡江若捕他盜者使其眾甲
以來因召御營副使劉光世及瓊赴都堂計事瓊從兵溢塗
甚意氣自如食已忠獻等相顧未發彥沖坐廡下恐事覺遽
取寫敕黃紙詣前揖瓊下謂曰有敕將軍可詣大理置對張

公數瓊諸罪瓊貽愕彥冲已揭榜疏其罪狀於省門忠獻使
光世出撫其眾曰所誅者止瓊耳若等固天子自將之兵也
眾投刃曰諾即分其兵隸神武五軍械瓊送棘寺後五日有
詔賜死中外快之先是國威不立諸大將多偃蹇不恭及瓊
就誅始知有國法矣

處州義役

德興
義役

乾道中范文穆

成大

知處州言松陽縣民輸金買田以助役

戶爲田三千三百畝有奇排比役次以名聞官不煩差科可
至一二十年者請命諸縣通行之事下戶部看詳蓋江浙民
久病差役注往破家竭產用是良民憚役爭訟囂然故
文穆以爲言熟事未下也及文穆爲中書舍人復言處州六

邑義役已成可以風示四方美俗興化請命守臣胡沂以其

規約來上從之乾道七年正月濼熙初知州事陳孺還朝乃言民間

貧富不均今止據舊規差役爭訟不已請依舊法以物力資

次差募事下常平司三年已而用言者請命郡太守務在必

行有能率先量與推賞六年正月言者又請有罰以禁其沮敗許

之六年二月於是知常州李結請捐官田予民以充義役自兩浙

始先以本州未經佃戶官田二十餘萬畝均給義役事下版

曹給舍議遂命結措置以聞六年正月而卒不能行久之處之布

衣上書申言義役事甚詳八年十月詔知州事李翔修義役事

翔因請民日百畝毋問其官民並僧道皆出田二畝以助保

正長官為置地簿基子孫毋得覬覦此法一成可為數百年

之利上許焉然官民僧道既出丁役錢又取其田以助役是再役也議者謂官吏科需法所當禁何立法以助殺人倍備之資由是處州舉人經御史臺訴其擾六年翔不以爲然執政王魯公等皆是翔時蔣尙書繼周爲右正言因力論其擾民請罷翔議令兩浙見行助役去處聽民從便官司不得預或有爭訟令郡縣如著令行十五年冬十月也先是我先君子爲饒州德興宰奉詔舉行義役事乃令民以田之多寡爲役之久近如多者役二年少者不過役三月又自三等以上各戶賦輸皆與之期不以委之保正至則隨手給鈔卽齎民一錢用是稅節賦時以後爲恥而保正之趨役亦爭先而不辭也邑人繪先君之像祠焉太府寺丞浮梁程宏圖爲之記

今二十年矣其義役規約故在當有能舉行之者云

建炎以來朝野雜記卷七

甲集

建炎以來朝野雜記卷八

甲集

宋李心傳撰

雜事

宇文肅愍死事

建炎初宇文樞密虛中應詔使北人留之後以為樞密使
 紹興中虛中陰結中原忠義欲埃虜酋郊天日舉事而使朝
 廷應之先以蠟書來上秦會之行事遽繳其書遣北人高宗
 不之知也會虛中事亦自泄致族其家株連死者甚廣漳熙
 中孝宗念其忠死始贈開府儀同三司諡肅愍且為置後其
 孫紹節今為右司郎中

繳還蠟書諡議云爾而
 或謂未必然蓋自露耳

何文縝建元帥議

靖康中何文縝初相虜再犯京師康王在河北文縝請以帛書拜王爲大元帥淵聖可之文縝旣北去御筆藏於其家紹興中文縝之弟榘持詣秦丞相乞進於朝秦方主和惡聞其事抑不奏秦死榘知萬州乃申建康乞會申王府御筆所在秦氏取而還之淳熙十二年洪端明領史院請下隆州索其書編於中興日歷榘子通判邛州事令修以聞詔付史館遷令修一秩知邛州云

朝士投匭免知在

故事臣民投匭上書者皆從檢院押出召保乃許自便紹興三年秋地震求直言太常少卿唐恕應詔上封事檢院官以故例待之辛閣學炳時爲臺端言有虧禮意請行在職事釐

務官上封事者並實封牒送檢鼓院投進不在召保知在送便之限從之

大臣奪情服繆

故事大臣奪情者服造光幘繆紫袍阜角帶道君惡之政和末始議以入公官不應變服遂以吉服朝然居家猶喪服也紹興初朱藏一起復右僕射請所服太常遂援政和近事爲請而居第則繆服去佩焉議者不以爲是

趙元鎮用伊川門人

趙元鎮初相喜用程伊川門下士當時輕薄者遂有伊川三魂之目謂元鎮爲尊魂王侍郎居正爲強魂以其多忿也謂楊龜山爲還魂以其身死而道猶行也時龜山初亡朱內翰

震

言於朝恩數甚厚故有還魂之目焉

鄭亨仲欲併掌利權

建炎中張魏公爲宣撫處置使節制川陝京湖十三路便宜
黜陟魏公旣罷其後去便宜猶於兵民財無所不總故其權
常重若財賦舊以都轉運使領之然大抵皆隸宣撫司紹興
中秦會之旣與鄭亨仲有閒十五年十一月始命趙侍郎不
弃以太府少卿爲四川宣撫司總領官蓋陰奪其柄亨仲不
悟也趙入疆移文宣撫司用平牒亨仲見之愕而怒久之始
悟其不隸己也十八年宣撫司罷又改爲總領四川財賦錢
糧蓋自爲一司迄今不改然自辛巳用兵後凡文臣執政官
爲宣撫使則總領官用申狀受約束武臣爲宣撫使則抗禮

平牒焉

節度使以軍禮見宣撫

紹興中鄭亨仲爲川陝宣撫副使大會諸將閬州時吳武順

璘

楊襄毅

政

郭恭毅

浩

皆以節度使來會亨仲坐堂上吏贊

客亨仲遽興日高猶不出旣而政先執挺謁亨仲乃受之尋
與璘浩循階以客禮見蓋璘時以右護軍都統制駐武興浩
以樞密院都統制駐漢陰而政在漢中實宣撫司都統制故
也十八年始有旨並稱某州駐劄御前諸軍都統制然詣宣
威府悉趨庭焉論者以鄭爲得體

虞井甫長者

虞井甫丞相仕未達嘗調官臨安攜所注新唐書以干秦丞

相書未上會其同舟者竊得本以獻秦并甫知之乃更以佗書爲贄已而竊書者先去疑并甫必怨已遇士大夫輒詆之并甫還知渠州過夔沈守約丞相爲帥問并甫以同舟之爲人并甫稱其美守約屢語之并甫不變守約曰是人毀君不容口君毋爲過情并甫曰渠所長甚多但差好罵耳守約太息稱其長者未幾守約入參大政白召并甫爲祕書丞以至大用云

陳魯公鎮物

紹興末金海陵煬王臨江中外懍懼朝士多遣家爲避兵計時陳魯公爲左相獨鎮之以靜人心少安一日邊郡羽書來上趣召輔臣公獨後至中使屢趣之陳行愈益緩上嘗夜出

手札欲散百官浮海避虜公對中使取御札焚之當是時都人將遁去賴陳不為搖都人乃止北兵退獨公與黃通老家屬在城中

張魏公薦士

隆興初張忠獻公再入為右相上注意甚厚使公條奏人才

可用者公奏虞雍公允文陳魏公俊卿汪端明應辰王詹事

十朋

張尚書闡可備執政劉觀文瑛王閣學大寶杜殿院起

華

宜即召還胡資政銓可備風憲張舍人孝祥可付事任馮

提刑時行馮少卿方可備近臣朝士中林侍郎栗王侍郎柘

莫少卿冲可任臺諫皆一時選也時劉王杜三人皆以論事

去國故公請召之其後悉為名臣終孝宗朝不顯用者數人

而已

趙溫叔使北

趙溫叔爲舍人使北還入見上問朕何如葛王溫叔奏曰臣觀葛王望之不似人君規模氣象不及陛下萬一中原不日可復也臣敢再拜賀上大悅

韓子師折虜使

淳熙中虜人有舉進士第一者

記其姓名不審

奉使來賀正旦自負

其辯頗凌慢王人時以韓子師

彥古

館伴一日虜使自謂其

廷試賦雲屯一百萬騎日射三十六熊之句以爲警策子師

遽曰一百萬騎僅能得三十六熊何其尠也虜使惘然熊射

侯也韓不學妄以爲熊羆之熊故北使猝無以應然自是辭

色頗恭時人亦多韓之敏捷

蘇文忠贈官

乾道末蘇文忠特贈太師世或不知其所以蓋仁宗時蘇儀甫嘗爲翰林學士元祐中以其子子容貴贈太師始儀甫嘗游金山題詩曰僧依玉鑑光中佳人在金鼇背上行至是蜀僧寶印在金山摘其詩名軒爲玉鑑又屬張安國大書而刻之張跋云此詩翰林學士贈太師蘇公所賦也碑成僧摹以遺大瑞甘昇一日上過其直廬外望見索觀之意以爲文忠也時文忠曾孫季真爲給事中它日上更書文忠詩以賜又識其末曰故贈太師蘇軾詩季真拜賜疑之前白曰先臣紹興初嘗贈資政殿學士未嘗贈太師今蒙聖恩乞自朝廷行下

上愕曰朕記贈太師久矣季真不敢白閒爲執政言之執政因奏以爲言上始喻金山寺詩乃蘇紳也因卽曰如軾名德昭著亦當贈太師於是降旨施行然上雅實敬文忠居常但稱子瞻或稱東坡舍人草制有曰人傳元祐之學家有眉山之書蓋詞頭無所憑故但爲好語耳

保任京官連坐

保任京官犯贓連坐舊制也然近歲未有舉行者濼熙初錢師魏參政事會其所舉者以賄敗上疏自劾詔特鑄三官吏部因以他舉官名聞皆坐降秩紹熙初趙溫叔所舉以贓抵罪用故事當削三秩而溫叔時爲使相若降三秩則應落袞鉞爲銀青光祿大夫朝廷難之於是自衛國公降封益州郡

公削其食戶二千而已其後周洪道連坐亦自益國公降封

滎陽郡公蓋用温叔例

益大國視郡公爲三資衛國故并削封戶

張敬夫遺表

張敬夫帥荊州庚子春疾甚數丐免不許將死自作遺表來上邸吏以庶寮不得上遺表卻之上迄不見也其表曰再世蒙恩一心報國大命至此厥路無由猶有微誠不能自已伏望陛下親君子遠小人信任絕一己之偏好惡公天下之見永清四海克鞏丕圖臣死之日猶生之年敬夫了然不亂如此所謂古之遺忠矣敬夫卒之四日上聞知其疾病乃拜右文殿修撰奉祠敬夫始以父任爲右承務郎平生未嘗乞磨勘上知之其在廣西特進二秩爲承事郎故職雖高終不得

任子云

王瞻叔與王時亨爭禮

自席大光後成都守臣率兼四川大帥惟本路監司以無轄之故得就廳事所下馬佗路則不然為守者率侍從近臣故監司見者必上喝更乘小輿自側門入紹興末王時亨為守王瞻叔為轉運副使將穿戟吏以故事白止之瞻叔不平佗日檄府以某人按視金穀簿書遂傳呼入戟據廳設坐而謂典謁吏曰今日轉運副使來點檢成都府公事非見制置使也時亨不能語

郡守越境省親

故事守臣無得越境者王正仲守揚其親居潤揚潤才隔一

水正仲因乞告省親許之乾道中史丞相守紹興援例省其
母於四明四明越屬郡也淳熙末耿直之侍郎爲四明守其
父年九十矣直之以親病乞祠未聽直之用故事謁告歸江
陰省親上特許之時有爲湖廣總領者以母老請用季春至
湖州迎侍上亦許焉孝宗錫類之施每如此

奉祀汾陰寶

淳熙十四年春有士人聶士愿者獲一古印以皇帝駕奉祀
汾陰之寶九字爲文重十三兩士愿以爲真宗西祀所作時
吳少保琚爲淮東總領以五百千償士愿取其寶獻於朝詔
藏天章閣士愿以其寶生金所鑄償價未足詣御史府訴之
蔣世修繼周爲中執法請命有司覆寶且言祖宗遺寶復歸

中禁縱使是銅亦當薄賞務重大體豈校細微事下工部將
作監覆實驗之果銅也乃詔士愿免罪三月己未按汾陰記封金
匱用受命寶封石匱用天下同文寶此寶不見於記載故朝
論疑之卒不加賞云

陳子長築紹熙堰

兩淮土沃而多曠土人且耕且種不待耘耔而其收十倍浙
民每於秋熟以小舟載其家之淮上爲淮民穫田主僅收十
五佗皆爲浙人得之以舟載所得而歸有張拐腿者淮東土
豪也其家歲收穀七十萬斛金人兵入執得之問以江南虛
實張不肯言遂斃其兩股無餘終不以告乃舍之後旣退師
張亦不死淮民因謂之拐腿云紹熙末陳子長損之提舉淮

東常平以淮田多沮洳因築隄數百里捍之得良田數百萬
頃事聞錫名紹熙堰子長除直祕閣淮東轉運判官朝廷念
淮民至於捐其稅

建炎以來朝野雜記卷八

甲集

建炎以來朝野雜記卷九

甲集

宋李心傳撰

故事

潛藩州建軍府名

舊制天子卽位嘗所領州鎮自防禦州而下皆升軍名若節
鎮州則建爲府如英宗自齊州禦防使登極升齊州爲興德
軍神宗自忠武軍節度使建儲升許州爲潁昌府之類孝宗
受禪以始封洪鼎宣建州舊有軍額則建爲隆興常德寧國
建寧府而劍州止升爲普安軍紹興中始再升爲隆慶府蓋用此制光宗
自榮州刺史進封恭王今上自英國公出就傅後封嘉王四
州皆爲支郡然三州躡升爲重慶英德嘉定府而榮州至今

不錫軍名蓋中書之誤

百官轉對

故事百官五日一轉對紹興六年十一月詔百官應轉對而疾病者許封進文字更不引對其後秦相當國久惡聞人言於是百官當對者多託疾不上十七年八月詔自今當對而在告者俟疾瘳日上殿命吏部約束之然所對者不過大理寺官十餘人姑應故事而已自孝宗臨政垂意人才乾道淳熙閒朝士抱才氣者皆以得見上爲喜而碌碌者頗以轉對爲憂然士大夫不爲大臣所喜者往往俟其對班將至預徙佗官至有立朝踰年而不得見上者蓋輪其官而不輪其人此立法之弊

大臣賜書閣名

宣政閒大臣賜書閣多得御筆閣名若蔡京曰君臣慶會王
黼曰得賢治定是也紹興初高宗以平江朱勳南園賜韓忠
武題其賜書閣曰懋功後秦申王閣曰一德格天楊和王閣
曰風雲慶會史會稽王閣曰明良慶會云

皇甫坦賜書閣名紹興煥文

宰臣生拜太師

國朝自建隆至紹濶宰臣生拜太師者五人爾趙韓王

普文

潞公

彥博

蔡魯公

京

秦申王

楹

史會稽王

浩

惟蔡秦二人以

相臣特拜其它皆還政加恩云

親王生拜太師

本朝親王生拜太師者五人真宗朝楚王元佐仁宗朝燕王

元儼哲宗朝吳王顥欽宗朝燕王僕越王偲皆以父兄行乃得之紹熙中嗣秀王伯圭以宗室特拜太師蓋王於光宗爲親伯父用優禮也

建隆至嘉泰宰相數

國朝宰相自建隆至嘉泰凡一百有二人前輩旣自建隆元年至元祐五年一百三十年凡五十人自元祐五年至紹興六年四十四年凡二十八人以爲兩倍於前矣自紹興七年至今嘉泰二年六十六年其閒宰相或席不暇煖而才二十有四人蓋秦會之獨相十八年故也

中興宰相久任者

中興宰相二十九人自秦申王外在位踰三年者八人而已

王魯公淳熙八年相十五年罷凡七年留衛公淳熙十五年相紹熙五年罷京魏公慶元二年相六年薨皆五年陳魯公紹興二十九年相隆興元年罷凡四年虞雍公乾道五年相八年罷趙衛公淳熙五年相八年罷周益公淳熙十四年相紹熙元年罷皆三年謝魯公慶元六年相至今亦近三年

宰相位公孤封國

高宗宰相十五人惟秦會之爲太師呂元真爲少保其它未有至公相者而封國亦止二人

秦益公檜張和公俊

孝宗宰相十五人

生至公少者五人而已史文惠太傅張忠獻陳正獻皆少師

陳文恭虞忠肅皆少保然封國者已十人

陳文公王文定皆封魯史文惠張忠

獻陳正獻皆封魏湯特進封慶虞忠肅封雍梁文靖封鄭趙開府封衛周少傅封許

紹熙後宰相凡七

人京仲遠以少傅封冀國公周洪道留仲至謝子肅以少保封益衛魯三國公葛楚輔余處恭官皆至特進宰相官爵之穹未有如近歲者也

中興宰相封國數

中興宰相封國者呂忠穆

成

秦申王

莘衛慶
冀魏益

張忠獻

和

湯特

進

榮陳文恭

信福

史郡王

永衛

陳正獻

申福

虞忠肅

濟成

梁

文靖

儀

趙開府

沂

王特進

信福

周少傅

濟許

留少保

申衛

魯

京文忠

沂鄭

謝少保

申岐

魯

一國封兩公

故事一國未有封兩公者宣和末鄭達明封燕國公及薨蔡攸乃封燕國漳熙中史太保封魏陳少傅封福及慶典陳傅

進封魏國公時史公尙亡恙也近歲趙沂公既封衛後數歲留申公以左揆復封衛國公一國二公蓋失於討論爾

宰相追封王爵

中興宰相追封王爵者二人秦申王以久任史會稽王以舊恩皆異數也

中興諸將封王數

中興諸將生享王封者四人張忠烈俊韓忠武世忠楊武恭

存中吳武順麟追封真王者五人張忠烈循楊武恭和吳武

順信韓忠武漸吳武安涪追封郡王者一人劉武僖光世安城

郡王

中興外戚封王數

中興外戚封王者自信安孟王忠厚始其後平樂韋王淵大
寧吳王益新興吳王蓋永寧郭王師禹皆以元舅之貴乃得
之慶元中韓太傅侂胄以中宮從曾祖封平原郡王蓋殊命
也

高宗朝參政最多

太祖乾德二年始置參知政事自是凡十三年止四人而已
仁宗在位四十二年參知政事凡三十七人徽宗在位二十
六年凡三十四人高宗在位三十六年凡四十八人孝宗在
位二十八年凡三十四人以累朝較之高宗朝除人最多蓋
秦丞相專權不欲其久在位故耳

小兩制除執政

故事小兩制未有除執政者乾道二年蔣子禮始自中書舍人除僉書樞密院事

中興左揆數

中興左相十六人高宗朝七孝宗朝六光宗及慶元嘉泰三外此若范覺民洪景伯蔣子禮葉夢錫趙温叔皆獨相而止居右朱藏一張德遠史直翁梁叔子皆再入而亦止為右揆焉

本朝宰執父在恩數

本朝執政父在者若王文康溥章雷州惇張文孝觀吳正肅

奎安觀文燾何開府桌朝廷皆因其入踐二府而峻加恩命

然但除四品寄祿官致仕爾徽宗用李太宰邦彥秉政眷遇

甚渥其父浦始特除右文殿修撰遷寶文閣待制奉朝請及
死又贈雜學士諡宣簡云浦懷州人以鍛銀爲生其除拜皆
非故事然當時無正之者政和初林彥正據自翰院擢爲執
政其父邵以寶文閣待制遷直學士蓋異之也近歲程參政
松爲諫長其父九萬以子在臺省日久自直敷文閣除祕閣
修撰嘉泰中以程入兩地再除華文閣待制提舉醴泉觀奉
朝請視政和恩數爲優云

國朝父子祖孫兄弟宰執數

國朝父子宰相二家呂許公申儀韓魏公儀祖孫宰相一家曾

魯公欽兄弟宰相一家韓康公莊敏父子執政十三家曹武惠

子武穆 韓忠憲子獻肅持石元懿子文陳晉公子恭王仲明子忠

簡王惠獻子安呂文靖子惠穆范文正子忠宣曾宣靖子令

蔡新州子彥清蔡儋州子居安秦申王子伯陽王敏節子能甫祖孫執

政八家張師黯孫簡翼王文獻孫康靖梁莊肅孫才甫富文忠孫季申

張章簡孫元量張榮僖曾孫忠文錢文僖元孫處和蔣穎叔曾孫子禮兄弟執

政十二家呂鎮南弟正惠陳文忠弟文惠任康懿弟安惠吳正肅弟正

獻吳惠穆弟正憲韓獻肅弟持國莊敏王文公弟和甫蔡儋州弟元度鄧

子能弟文簡洪文惠弟文安宇文仲理弟肅敏叔姪執政四家胡文

恭從子修簡林文節從子彥振史簽樞從子文惠章文獻從子厚三世宰相

一家呂文穆從子文靖三世執政二家韓魏公子儀公曾

魯公子令綽四世執政一家呂許公從父文穆子惠穆孫欽道

渡江後父子兄弟建節數三世四世五世建節

渡江後父子建節十三家劉光世子景錢忱父景邢煥子孝

韋淵子謙吳玠子拱吳璘子挺郭浩孫果楊存中子傑劉錡父武吳益子

璠子吳蓋子懷吳挺子儀兄弟建節七家吳玠子璘錢忱子恂韋謙子吳

益蓋吳挺拱吳瑒懷李孝友孝純三世節度使一家吳璘子挺

四世節度使二家錢忱高祖曾祖惟演父景臻鄭藻大父紳父成五世

節度使一家韓侂胄曾祖忠獻從子遜從孫同卿從曾孫埃

本朝未三十知制誥未四十拜相者

本朝未三十知制誥者蘇文簡二十吳元中二十晏元獻宋

宣獻王懿恪張安國皆二十王文正夏文莊皆三十未四十執政

寇萊公三張魏公三十晏元獻三十蘇文簡錢宣靖韓魏公

皆三十六趙韓王王沂公皆三十九富韓公四未四十拜相者范覺民

三十 吳元中何文纘皆三十八張魏公三十

中興學士秉政者

中興學士自建炎丁未至嘉泰壬戌凡七十人承旨直院大權直並係

拜者十一人朱忠靖勝非沈特進該湯慶公思退虞雍公允

文史魏公浩洪文惠适蔣觀文芾梁鄭公克家周益公必大王

魯公淮葛開府邨執政者又二十九人可謂盛矣

渡江後學士再入三人者

渡江後學士三人者二人胡端明交修王端明曦再入者十

六人張文靖守綦寶學密禮沈忠憲與求陳資政與義孫資

政近劉閣學才邵李侍郎椿年洪文安遵錢給事周材洪文

敏邁劉忠肅琪鄭資政聞周益公必大王魯公淮倪侍郎思

國朝學士久任再入三人者

學士久次者晁文淵迴十六年王文恭珪十三年王文忠堯

臣十二年宋文安白章文憲得象趙清獻栻楊內翰偉皆十

一年陶尚書穀丁文簡度皆十年扈尚書蒙蘇參政易簡賈

參政黃中李昌武宗諤孫文懿卬胡文恭宿皆九年徐常侍

鉉楊文公億皆八年歐陽常侍迴宋宣獻綬歐陽公修皆七

年梁給事周翰李相州維晏元獻殊馮宣靖元皆六年熙寧

後學士率一二年即遷久次者三四年而已高宗朝湯慶公

孝宗朝周益公始皆六年

學士再入三人者宋文安兩入凡二十年李相州孫文懿皆

十二年楊文公范仲文皆九年曾宣靖馮文簡皆七年葉道

卿張文定皆六年宋景文楊宣懿皆三入而止五年渡江後周益公再入凡九年胡端明二入跨六年久次者止此二公而已

父子兄弟入院數

錢文僖公記父子入院一家李文政昌武兄弟入院三家二

寶可象二李文靖二錢希白以為極盛矣其後父子入院者

又四家錢希白子飛梁仲素莊肅蘇儀甫子容洪忠宣景伯

兄弟入院者又九家二陳文惠二宋元憲二吳正肅二韓康

持二蘇文忠二曾文肅二蔡元長二字文仲理三洪文惠

然洪氏父子兄弟入翰苑者四人古今所未有也

西閣久次

祖宗時西閣久次者王晉公再入凡十六年朱公巽十二年
廬崖州十一年扈日用李孟雍皆十年張尙賢石文定皆九
年錢文僖宋宣獻李儀父皆八年李相州王沂公劉子儀張
文孝皆七年盛文肅錢希白丁文簡晁文莊皆六年

非進士除內外制臺諫經筵史館事始

國朝非進士出身除學士自林彥振始韓持國已省試合格但避嫌不赴廷試

除舍人自顏夷仲始除講官自吳傳正始除諫官自徐師川

始除臺官自曾統始除史官自邵博始任申先已先賜出身除修注後乃入史院

中興講讀官節料

中興講讀官三大節料大觀文錢百五十千酒十瓶大資政以上錢百

從官錢五十千酒六瓶餘官錢三十千酒三瓶紹興十五年冬所著令也

制科宰執數

國朝制策登科四十人至宰相者一人而已富文忠彌執政

者九人夏文莊萊吳正肅育張文定方平田宣簡況吳文肅

奎邵安簡亢蘇文定轍李黃門清臣范榮公百祿

詞科宰執數

自紹聖乙亥至紹熙癸丑以宏詞中選者凡七十二人其後

至宰執者十一人孫忠定傳滕樞密康盧左丞益張文靖守

范參政同秦忠獻檜周樞密麟之洪文惠适洪文安遵湯慶

公思退周益公必大入翰苑者二十一人吳龍學开盧左丞

益孫尚書覲張文靖守滕樞密康胡尚書交修范參政同劉

侍郎才邵王端明曠湯丞相思退周樞密麟之洪丞相适洪

建炎以來月字推己卷七 甲集 適園叢書

樞密遵 洪內翰邁 莫直院濟 周丞相必大 趙舍人彥沖 李尙

書燾 陳侍郎峴 陳內翰宗召

狀元大拜數

建隆以來狀元已沒者六十九人而大拜者七人而已呂文

穆蒙正 王文正曾 李文定迪 宋元憲庠 何開府棗 梁文靖克

家趙銀青汝愚 是也執政凡十一人楊樞密彧 王景莊嗣宗

蘇參政易簡 陳文忠堯叟 張文孝觀 蔡文忠齊 王文忠堯臣

馮文簡京 許黃門將 陳樞密誠之 鄭樞密僑 是也節度使二

人陳康肅堯咨 王懿恪拱辰 是也

父子祖孫兄弟狀元父子兄弟賢良

國朝父子狀元三家張去華子師 安德裕子守 梁顥子固 祖孫

狀元一家沈邁孫兄弟狀元二家二陳文忠二孫漢公父子

賢良一家錢希白子明逸兄弟賢良二家二錢子高二蘇文忠

文定

狀元舉制科

唐貞元中魏宏簡以狀元舉賢良自是無繼之者至國朝而

狀元舉制策者復二人孫舍人何孫學士暨二公咸平初連

榜冠多士咸平四年同以賢良方正登科近古所未有也

狀元年三十以下數

狀元年三十以下者王宣徽拱辰汪端明應辰年十八沈內

翰邁年二十莫內翰儔二十二梁內翰顯張舍人孝祥王尙

書佐皆二十三楊樞密礪蘇參政易簡木尙書待問皆二十

四王丞相

曾

王參政

堯臣

張監丞

唐卿

賈內翰

黯

彭尚書

汝

衛舍人

涇

皆二十五何僕射

桌

趙丞相

汝愚

皆二十七蔡樞

密

齊

宋丞相

庠

馮樞使

京

楊監丞

寅

姚祕書

穎

王叔興

昂

皆

二十九陳樞相

堯叟

張參政

觀

詹舍人

駢

許僉判

奕

皆年三

十

狀元十年執政五年持橐人數

狀元及第不出十年而執政者呂許公

蒙正

丁丑榜癸未年

參知政事凡七年董資政

德元

丁卯榜甲戌年參知政事凡

八年梁鄭公

克家

庚辰榜己丑年簽書樞密院事凡十年狀

元及第不出五年為侍從者余給事

桌

自及第至給事中凡

二年蘇參政

易簡

霍侍郎

端友

自及第至知制誥凡四年陳

英公堯咨自及第至知制誥凡五年此外呂許公何文縝自

登第至大拜十二年梁鄭公自登第至大拜十三年而王文
正馮文簡趙莊叔自登第至知制誥亦止六年趙溫叔自登
第至爲中書舍人亦止八年

狀元三年執政者二年持橐者

奉伯陽紹興十二年以右通直郎登第一年而爲禮部侍郎
三年而知樞密院事其子塤紹興二十四年登第明年爲禮
部侍郎古今所未有也

狀元特任子

仁宗時狀元孫暨楊寘死於京皆得官一子紹興元年六月
利州通判何洙言其弟渙死於承事郎大學博士請予一子

官許之其後黃司業終於承議郎直顯謨閣中 余校書復

終於奉議郎慶元中 皆特官其子一人用此故事

近臣舉御史

祖宗故事御史有闕例命兩制學士舍人為兩制 給舍中丞知雜侍御

史知雜京 同舉一二人自官制行朝廷直除而已 漳熙初孝宗始

復故事命近官參舉然從官皆畏避鮮敢以聞故此制又廢

至紹熙末纔一舉行耳

南班宗室及堂後官臺參事始

中興後南班宗室赴臺參自士移等始紹興四年二月朔 堂後官赴

臺參自魏彥弼等始紹興三年九月丙子 皆本臺請也

舍人引嫌不草制紹興三年九月丙子 皆本臺請也

紹興初王剛中居正獨員爲中書舍人時適當三制一其弟居修改京官二甥堦劉立道除起居舍人三本身磨勘剛中引嫌自言乃命左司郎官周綱權舍人命詞行下其後李舍人誼兼直學士院屬李丞相伯紀辭免潭帥有詔不允而李嘗劾伯紀伯紀免章略曰當時言路公肆詆誣李亦以爲言乃命劉舍人一正草制焉都司行制詞閣下草批答二事皆東都所未有也先是胡尙書交修直學士院其妹丞公請祠不許胡當爲答詔引嫌於朝乃命胡明仲舍人爲之遂爲故事

舍人草內制

近歲翰苑止雙員淳熙五年學士周洪道爲御試詳定官直

院范致能除參知政事本院闕官得旨遇有撰述文字依例
權送中書舍人十四年學士洪景盧知貢舉直院李獻之出
使主待制詔孔目官李植請於朝遂用五年例云

檢正讀錄黃

紹興二年十二月韓世忠賞功文字給事中賈安宅除部侍
郎門下後省闕官乃詔檢正李與權書讀此事亦前所未有

密白

舊制樞密院事並過門下省乾道元年十二月癸丑言者請
自今樞密院已被旨文書並關中書門下依三省式畫黃書
讀以示欽重出命之意從之然密院機速事則不由中書直
關門下省謂之密白慶元三年樞密院以密白遷補潛邸醫

官二人給事中許深父以非舊典爭之遂寢其命

給舍不許列銜奏事

自元豐分三省中書舍人於制敕有誤許其論奏而給事中乃所以駁正中書違失紹興以來閒有駁正或給事中中書舍人列銜同奏乾道五年二月辛亥中書舍人汪養源言祖宗官制以中書爲出令之地而門下審駁覆正然後付之尙書三省皆置官屬以便相彌縫可否分守甚嚴無礙侵越今給舍列銜同奏則是中書門下混而爲一非神宗所以明職分防闕失之意上以爲然詔復從舊例

禮官學士爭詔紙

乾道中李仁父爲禮部郎中洪景廬直學士院時占城入貢

詔學士院答敕景盧引故事乞用金花白藤紙寫詔而仁父
上言當從紹興近例用白藤紙作敕書景盧以爲侵官論奏
其事上曰禮官議禮豈可謂之侵官近例可憑止從紹興可
也景盧深不憚其后仁父修四朝列傳垂就而卒上命景盧
續成之景盧筆削舊史乃無完篇蓋素不相樂也於是上促
進書甚急而新書未畢王偁季平以東都事略來獻遂取用
焉或者但見新書疏略舛誤甚多而不知倉卒之間不暇考
擇也書成進御景盧援季平於朝得直祕閣云

官告式

自建炎後待從及宗室南班官遷除始給告大卿監防禦使

以下止用黃敕其後以絹代綾羅纈羅代錦

監察御史已上用錦

紹興

四年始命職事官監司已上並給告十四年始用錦其后又
詔內命婦及外命婦郡夫人已上乃得用網袋及銷金其餘
則否漳熙十三年李叔永昌圖爲工部侍郎用郊恩贈其父
用賓少師私命文思院工閤諒以銷金綾紙爲告陳子榮侍
御劾於朝坐落職奉祠

前從官許服紅帶

故事從官不帶待制已上職名而罷者止服黑帶佩魚漳熙
中王仲行自吏部尙書除端明殿學士知紹興府未行以言
章奪職仲行朝辭上殿服金帶垂魚而入閤門吏止之仲行
卽解所佩魚閤門猶以爲不可乃從小吏假黑帶以見仲行
殊不平十年十月始有旨權侍郎以上罷任不帶職許服紅

韞排方黑犀帶仍佩魚自是遂爲定制

紫衫

自軍興士大夫始衣紫窄衫上下如一紹興九年八月甲子詔公卿長吏毋得以戎服臨民復用冠帶然迄不行秦會之死魏道弼秉政復舉行之論者以爲擾士人貧者尤患苦之未幾道弼爲臺諫所攻遂罷攻章中數事此其一也於是紫衫旣廢士大夫皆服涼衫乾道中李獻之爲學士爲上言會聚之際顏色可憎今陛下上奉兩宮宜復紫衫爲便上從之蓋自渡江以來人情日趨簡便不可復故矣

國郵服涼衫紫衫

孝宗之喪趙子直當國始令羣臣服白涼衫阜帶以治事逮

終喪乃止論者以為是及光宗之喪禮部侍郎陳宗召復請百官以日易月禫除畢服紫衫阜帶以治事從之

渡江後賜墓碑額

渡江後大臣未有賜墓碑額者紹興初上始書韓文定神道

曰世濟盛德之碑其後得此賜者亦不多秦丞相清德父啟慶秦

丞相決策元功陳文恭精忠楊和王安民定功劉忠顯旌忠

吳信王安民保蜀韓蘄王中興佐命史太師純誠厚周益公

忠文
耆德

大臣諡之極美者

大臣諡之極美者有二本勳勞則忠獻為美論德業則文正為大有國二百年諡忠獻者才三人趙韓王韓魏王張魏公

是也諡文正者才亦三人王沂公范汝南公司馬温公是也

其品可知矣

李司空王太尉皆諡文貞耳宣政間蔡卞鄭居
中亦諡文正終不足錄渡江後秦檜諡忠獻實

博士曹冠為之

定諡不許更易

慶元末京丞相薨賜諡文穆既而其子沆請避家諱改文忠於是言者以為楊億巨儒既諡曰文議者欲加一忠字竟不之與夫欲加一字猶且不可况諡以二字又欲極美乎望敕所司自今議諡務當其實其或不然當準古法以選舉不實論若定諡已下其子孫請再更易者以違制論從之

渡江後改諡

渡江後公卿諡號王仲言揮塵錄有之但殊脫略今不能盡

記記其更易者韓師朴丞相初請諡王剛中爲博士諡曰文

禮諡法奉議順則曰禮取其爲禮官時不主王荆公坐講之議也而韓

氏子謂自來未有以禮爲諡者以白時相范覺民覺民語剛

中剛中不爲改於是用吏部覆議改爲文定

左選侍郎李長民

京東

帥曾孝序之死難也博士錢葉諡曰剛愍執政嫌之乃改曰

威韓都尉嘉彥之請諡也博士華權定爲夷節而方庭實在

考功以端節易之司馬侍郎朴之賜諡也博士詹林宗定以

忠肅而張敬夫在吏部以忠潔易之此四者皆於諡未定之

前更易者也代州王忠植之死也太常諡爲義節而秦丞相

以忠字無之爲疑令別議太常謂若以忠爲諡則子孫誦之

非易名之義也遂已孝宗初立命有司爲岳飛作諡太常議

危身奉上曰忠使民悲傷曰愍孝宗以爲用愍字則於上皇
爲失政卻之乃改爲武穆此二者皆於諡已定未下之前有
所退卻者也劉萃老丞相初諡正肅當矣而正字犯丞相父
名乃改爲忠肅趙崇公叔寓初諡敦簡美矣而敦字與光宗
御名同音其曾孫德光請於朝改諡清簡此二者皆出於諡
號已下之後然迫於名諱不容不避者也蓋自紹興至淳熙
六十餘年之間改諡纔六七皆有所爲非京丞相之比矣張
參政綱初諡文定汪聖錫爲吏部尙書駁之乃改章簡後其
孫貴竟復諡文定焉

建炎以來朝野雜記卷九

甲集

建炎以來朝野雜記卷十

甲集

宋李心傳撰

官制一

丞相

總論建隆至乾道相名更易

丞相秦官也自漢末改爲大司徒歷代不能正國初循唐制以三公至列曹侍郎同平章事爲宰相首相帶昭文館大學士亞相帶監修國史末相帶集賢殿大學士神宗新官制於三省置侍中中書二令虛而不除以尙書左右僕射兼門下中書侍郎爲兩相然中書揆而議之門下審而覆之尙書承而行之則是首相不復與朝廷議論矣元祐初司馬公相乃請令三省合班奏事分省治事自紹聖以後皆因之時議者

謂門下相凡事既同進呈則不應自駁已行之命是省審之職可廢也政和中蔡京以太師總領三省號公相乃廢尙書令改侍中中書令爲左輔右弼亦虛而不除改左右僕射爲太宰少宰仍兼兩省侍郎靖康中何文纘將拜相夜夢人持弓矢射中其僕乃先乞復太少宰爲僕射吳正仲當制請更爲丞相不從建炎三年呂元直初相議者請併三省爲一於是元直解中書侍郎改同中書門下平章事乾道八年孝宗稽古改左右僕射爲左右丞相去侍中兩令之名遂爲定制

御營使 御營宿衛使

御營使者建炎元年六月始命宰相李伯紀爲之本以行幸總齊軍中之政其後遂專兵柄樞密院幾無所預呂元直在

位專恣尤甚臺官趙元鎮等以爲言元直遂免時議者以爲
宰相之職無所不統本朝沿五代之制政事分爲兩府兵權
付於樞密比年又置御營使是政出於三也請罷御營使以
兵權付之密院而以宰相兼知庶幾可以收兵柄一賞罰節
財用四年六月甲戌遂以宰相范覺民兼知樞密院事罷御
營使及官屬以其事歸密院爲機速房御營使一員或二人
以宰相兼副使一員
以執政官兼參贊軍事以從官兼提舉一行事務以紹興三
大將兼其將佐有都統制一員及五軍統制已下官
十一年金海陵入境上將臨江視師其冬以和義郡王楊存
中爲御營宿衛使事平復免明年孝宗卽位又以御營使命
之然但自名一司掌殿前忠勇等軍非復建炎之比矣

都督軍馬

同都督

都督古官也晉宋閒有之自唐以來不置紹興初呂元直復相謀進取秦會之亦欲奪其權乃共議令元直以左僕射都督江淮荆浙諸軍事置司鎮江元直覺之遽歸而命孟富文以參知政事權同都督已而落權字四年趙元鎮自知樞密院事爲川陝宣撫處置使元鎮以與吳玠共事爲嫌乃改都督川陝荆襄諸軍事五年春元鎮與張德遠並相遂帶兼都督諸路軍馬入銜七年秋德遠將罷先廢都督府隆興初德遠再入乃命以樞密使都督江淮軍馬馬二年德遠去位都督府復廢其秋紇石烈志寧入寇詔湯進之以左僕射爲之進之逗遛不行乃命王瞻叔以參知政事爲同都督瞻叔亦丐免於是遂命和義王楊存中代爲都督府非宰相而爲都

督自存中始

都督行府

張魏公之爲都督也以行府爲名凡事干朝廷則關會三省樞密院孟富文時在政府大不平曰三省密院乃奉行行府文書邪因稱疾求去隆興初魏公再爲都督時宰相陳魯公湯慶公皆主和議故朝廷所行多與都督府異魏公乃言臣節制江淮馬軍其進退調發當從督府取旨施行近日主兵官及帥守監司輒以軍期事務徑申朝廷乞劄下依本府指揮仍取當行人責軍令狀外謹具奏知上曰豈有不申朝廷之理十月辛巳乃詔江淮軍馬調發應援從督府取旨施行其餘事務並令申奏如舊

督視軍馬

督視軍馬者紹興三十一年冬十一月葉審言始以知樞密院事爲之朝議以審言非相臣故其名下都督一等蓋不考趙豐公故事失之也隆興初張魏公旣爲江淮都督乃命汪明遠澈以參知政事督視湖北京西軍馬焉方城失守汪責台州遂并令魏公督之

制國用使 同知國用事

制國用使舊未有隆興初言者請法有唐之制命宰相兼領三司使職事財穀出納之大綱宰相領之於上而戶部治其詳上是之命祕省討論來上乾道二年冬遂命宰相兼制國用使參知政事同知國用事五年二月戊申罷國用司八年

正丞相官名夏四月詔丞相事無不統所有兼制國用事與參政更不入銜云

參知政事

參知政事自太祖朝始置元豐官制改爲門下中書侍郎尙書左右丞建炎三年合三省之政於是李漢老自尙書右丞改除參知政事復舊制也故事丞相謁告則參預政事之臣例不得進擬差除惟丞相薨罷上未得人則參知政事行相事多不踰年少者才旬月獨淳熙初葉夢錫罷相龔實之行丞相事近三年言者以爲懷私擅政遂有英州之禍焉

樞密使

樞密使自唐以來率二員周末魏仁浦吳延祚並爲之國初

仁浦拜集賢相自是止除一使至太平興國初曹武惠彬楚

景襄昭輔始復並除後未有繼之者及眞宗中年以王文穆

陳文忠並爲樞密使由是遂爲故事迄仁宗不改英宗治平

四年文忠烈呂惠穆神宗熙寧五年文忠烈陳秀公並使樞

密用此故事高宗紹興十年張循王俊韓蘄王世忠既罷兵

乃並除樞密使十二年張循王猶在位時以孟信安王忠厚

爲山陵使乃亦暫拜樞密使焉渡江後元樞並除蓋有所爲

也

知樞密院事

知樞密院事太宗淳化二年始置以張遜爲之然使與知院未常並除熙寧元年文潞公呂宣徽爲使陳秀公自會稽召

爲知院非故事也元豐官制行廢樞密使故政和末鄧莘公
官至少保猶止爲知院焉其後鄭居中蔡攸童貫之徒旣位
三公乃更領樞密院事紹興七年秦申王爲使沈忠敏自同
知遷知院事蓋張魏公旣薦秦相未欲其與已並又以故相
不可除他官乃先白高宗降旨以本兵之地事權宜重依祖
宗故事置樞密使而知院同知院亦皆仍舊由是並除自後
則否

樞密副使

祖宗故事樞府置使則除副使置知院則除同知院淳化二
年太宗旣以張遜知密院於是寇忠愍温恭肅皆自副使改
同知院事康定元年仁宗用晏元獻公爲樞密使於是王鄧

公杜正獻鄭天休皆自同知改除副使自後皆然元豐末廢副使渡江後秦申王首復除樞密使王敏節副之既而張韓二大將並除樞密使岳武穆副之合故典矣近歲張魏公汪明遠虞弁父王公明王季海周洪道王謙仲趙子直繼除樞密使而其副止稱同知蓋相承之誤

簽書樞密院事

簽書樞密院事太平興國四年置是時石元懿公以兵部員外郎充樞密直學士止用本官職簽書自是初除皆帶密直及罷政乃拜端明殿學士焉太宗至真宗朝文臣簽樞才五人其四人遷樞副張文定以本官罷至神宗時曾公綽以憂去免喪乃除端明元豐官制廢元祐後王彥霖劉仲馮皆以端明罷遂為故事元豐官制廢簽書其後童貫以使相為之上以貫官至三司乃更為領院

事靖康初李參政回首拜延康殿學士簽書延康令爲端明
自是遂爲故事

同簽書樞密院事

同簽書樞密院事自郭宣徽後不置明受末李漢老鄭致剛
嘗並拜未及謝而上反正李遷右丞鄭落同字紹興七年王
倫交割地界亦命帶焉其後不復置隆興末虞雍公一爲之

升朝官除簽樞

簽書樞密故事有以員外郎爲之而無三丞以下爲之者元
祐初王彥霖以承議郎龍圖閣待制除授乃特遷朝奉郎建
炎後張全眞富季申皆自奉議郎御史中丞除簽樞亦用此
制靖康二年曹忠達輔紹興十四年李資政文會皆以升朝

官爲之

曹承議郎李奉議郎

蓋中書失之而舍人無正之者

樞密參用文武

張說本末

自建炎以來樞密使副參用文武仁宗親政以後但除夏守
斌王貽永王德用狄青數人英宗朝郭達一人而已元豐改
官制武臣不爲二府政和末始命童貫簽書河西北面兩房
事後遂領院事焉靖康用兵乃除种忠憲師道建炎中復除
王襄愍淵時苗傅等不平遂有明受之變自是武臣不復典

樞密矣紹興九年秦丞相將罷三大將兵柄乃以樞密副使
授之蓋自童貫後皆因事用人非常典也乾道七年張說爲
明州觀察使樞密都承旨說娶壽聖皇后女弟上厚眷之時
爲政乃除說簽書樞密院事制下朝論闐然說辭不果拜遂

以安慶軍節度使還第焉踰年復以是命之說亦不辭又踰年遂進知樞密院事凜熙元年秋罷爲太尉尋降觀察使居撫州三年冬許自便七年秋卒上念之詔復承宣使陳給事峴封還錄黃乃止說子薦文州刺史說敗亦貶郴州堯明州觀察使

外戚典樞密

祖宗盛時率用外戚典兵馬而無使樞密者惟慶歷中王鄧公貽永以主壻爲之然議者不以爲忝元祐中韓文定在樞密其弟端節旣選尙爲臺諫所攻旋亦罷去紹興初樞密都承旨闕執政請以保靜軍承宣使邢煥爲之煥懿節后父也上曰朕不欲戚里任朝廷官乃不許上受禪韓平原侂胄自

知閣門事除都承旨亦固辭因自請奉祠云

紹興中孟仁仲使樞密蓋以典

山陵故事已卽罷之

樞密院屬官

樞密院屬官舊有都副承旨以武臣爲之編修官二員以文

臣爲之熙寧中始以文臣爲都承旨元祐後又詔恩數如權

侍郎紹聖初廢高宗在會稽武臣辛道宗爲都承旨頗用事

紹興初道宗旣免乃詔用兩制爲之

元年十二月丙寅

然但閒除一

二人而已淳熙中王抃用事久孝宗惡焉遂復用士人今上

初立辟象先以戶部侍郎兼都承旨何自然以爲非祖宗成

憲斥去之建炎中又用元豐故事置檢詳一員祿賜與都司

外郎等

三年六月庚午

時御營司旣廢密院置幹辦官四員旣而以

其名不雅馴改爲計議官在編修官之上建炎四年十一月已卯紹興

十一年始省四月庚寅

三省樞密院賞功司

建炎初李伯紀爲政始於三省樞密院置賞功司呂元直初相遂省之及范覺民以宰相兼樞密乃於密院置機速房紹興二十九年又罷辛巳用兵復置逮乾道八年始罷凡錢糧事歸三省邊防兵政歸密院焉

拾遺補闕

遺補唐官也太宗以正言司諫易之漳熙十五年正月兵部侍郎林栗言國家累年以來宰執百僚職無虛位御史三院亦不乏人獨諫諍之官尙有闕員居其位者往往分行御史

之職至於箴規闕失寂無聞焉願依唐制置拾遺補闕左右各一員皆三年爲任仍面加訓諭官以遺補爲名不任糾彈之職孝宗從之以許深夫辭象先充其職班著在監察御史之上請給人從依監察御史例光宗立復省

直學士院

權直學士院學士院權直

行宮直院翰林權直

直學士院自開寶二年盧丞相多遜始權直學士院自開寶

六年張舍人澹始翰林權直自乾道九年崔舍人敦詩始學

士院權直自淳熙五年崔舍人敦詩始國朝故事率以從官

兼直院若左右史少卿監之類則止稱權直院焉近歲崔大

雅以樞密院編修官趙大本以校書郎陳內翰宗召以著作

佐郎兼直蓋特命也紹興末高宗視師建康時何內翰溥屬

疾不能從而直院虞并父使兩淮乃命唐立夫以起居郎兼行宮直院車駕還復省

庶官兼侍講

故事經筵官自兩省臺端以上並兼侍講若大卿監以下則止兼崇政殿說書元祐中司馬公休以著作佐郎兼侍講時朝議以文正公之賢故特有此命乾道末張敬夫以吏部員外郎入侍經幄用公休故事亦兼侍講焉自改官制後庶官非二史而兼侍講者才數人范純甫司馬公休張敬夫是也

國朝經筵非進士出身者三人吳傳正呂原明張敬夫

翰林講讀學士

翰林講讀學士真宗朝始制元豐官制去翰林字及學士名

元祐中復之以命蘇子瞻趙元考而已渡江後獨范元長嘗
一爲之

史館專官

陸務觀本末

自真廟以來史館無專官神宗嘗欲付曾子固以五朝史事
乃命爲史館修撰使專典領其後子固所草具不當神宗意
書不克成孝宗時修五朝史列傳久而未畢遂召李仁父洪
景盧踵爲之皆奉京祠不兼它職者數年而史始畢蓋自開
院至成書凡二十有八年秉筆者百有餘人時景盧請修九
朝正史上許之景盧復言制作之事已經先正名臣之手是
非褒貶皆有据依乞命後來史官無或輒將成書擅行刪改
然書未就而景盧去國淳熙末修高宗實錄但以它官兼之

至紹熙末年而功未及半陳君舉直學士院建請以右文殿
祕閣二修撰并舊史館校勘三等爲史官自校勘供職稍遷
祕閣修撰又遷右文殿修撰在院三五年如有勞績就遷次
對庶幾有專官之效無冷局之嫌然亦不克行明年但增檢
討官三員限一年畢其後又七年而高錄始成時當修高宗
正史孝宗光宗實錄朝論覺無專官始外召傅景仁陸務觀
爲在京宮觀免奉朝請令修史於是務觀還政久矣乃落致
仕以爲同修國史兼實錄院同修撰焉務觀山陰人時年七
十有八

提舉祕書省

提舉祕書省者官制以來無之政和中初置以命蔡攸其後

秦伯陽繼居是任紹興末高宗召信安孟王

忠厚

為醴泉觀

使乃命提舉祕書省以寵之月過局如宰執例孟王薨亦省

提舉太史局

提舉太史局者舊例以近臣兼之熙豐閒司馬公王和甫繼居是任後不復置紹熙五年十月復置以命辭象先明年何自然以非舊典為言遂罷去蓋務反趙子直之政而不詳考也太史局官舊止於五官正孝宗時始增春夏秋冬中五官大夫

六院官

六院官檢鼓糧料審計官告奏進也例以京官知縣有政績者為之亦有自郡守除者則繼即除郎如鹿伯可是也故恩

數略視職事官而不入雜壓紹興十一年胡汝明以料院除
監察御史遂遷副端乾道後相繼入臺者有宋敦書蕭之敏
陳升卿傅淇等數人而六院彌重號爲察官之儲矣淳熙初
龔夔之秉政其內弟林宓幹辦審計司遇郊恩而林尙京秩
乃白上以六院官班寺監丞之上林用是得封贈父母龔後
爲謝廓然所論南竄此其一事也紹熙二年夏六月院官始
復入雜壓在九寺簿之下焉

五月庚戌降旨

環衛官

環衛官者唐有之領宿衛兵若今之三衙祖宗時其官不廢
然無職事但以處藩帥代還及宗室除拜而已元豐官制改
外臣皆不除惟宗室則如故隆興中孝宗始命學士洪景巖

等討論故事因復置以授武臣其法正任除上將軍承宣使

為正 遙郡除大將軍以階官領刺史至 正使除將軍武翼大夫已上

副使除中郎將武翼郎 使臣以下左右郎將訓武郎 皆有添

給及從人而無職事若除管軍則解或領閤門皇城司之類

則仍帶焉惟戚里子弟不除是時李太尉顯忠 首除左金吾

衛上將軍上諭湯慶公曰此正如文臣館閣耳平時在環衛

中庶見得人才近歲郭太尉杲 自右驍衛郎將受知孝宗以

本官口口口口職事不二三年遂至邊帥矣迄今環衛官皆

為戎帥之儲云

內侍兩省

入內內侍省內侍省皆宦官職也舊號前後省紹興三十年

九月以前省無職事遂廢之今入內內侍省舊後省也吏額
三十五人分五房所掌內殿引對羣臣發金字號收接邊奏
賜臣寮到闕茶藥新除執政官御史中丞支賜宗室節度使
已上生日宰臣已下夏臘藥春幡勝新火喜雪御筵每月奉
香表往殯宮忌辰酌獻看經設獄太廟薦新并奏告差宮闈
令大禮執事并奏主進袞冕祈禱降御封香車駕行幸差官
應奉人使在道及到闕燕賜宣召學士及試官御試一應事
務聖節賜宰臣以下齋筵皇太子乳香執政官酒果辨驗迎
奉到御容賜蕃夷宴大朝會差應奉等官皆其職也其官有
都知副都知押班等名色渡江後又掌藏金國誓書入寶內
東門司內侍省屬也掌機密門戶合同憑由司掌御前及宮

禁取索金帛御藥院掌應奉禮儀衣服湯藥舊制內侍遇誕節許進子年十二試以墨義卽中程者候三年引見供職紹興三十二年冬張眞甫爲殿中侍御史以宦者員衆爲上言之孝宗曰朕有此意久矣祖宗時止許人進一子朕意欲依祖宗法眞甫奏事畢上曰此曹人多則黨盛今入數已不少若平時無事猶可設使當母后少主之時豈不能爲禍漢唐之事是已遂命內侍省開具見在人數奏聞元年會慶節權免進子於是定以二百人爲額焉

閣門

閣門左列清選也舊有知閣門事同知閣門事多以外戚勳貴爲之其下有閣門宣贊舍人掌唱贊書命閣門祇候掌侍

衛班列乾道閒孝宗始倣儒臣館閣之制增置閣門舍人以
待武舉之入官者先召試而後命又許轉對如職事官供職
滿三年與邊郡遂爲戎帥部刺史之選云近歲熊提刑飛譙
知閣熙載姜節使特立之進皆自此階故武臣以舍人爲清
要紹興初蔣介有召試之命葛楚輔丞相言介武舉第一人
乞免試上從之二月九日
丁卯降旨

建炎以來朝野雜記卷十 甲集